

重印朝鮮世宗實錄地理志序

孟 森

古朝鮮國遞嬗而爲三韓，爲高麗新羅百濟三國，又爲高麗統一國，至李氏朝乃請改國號於明，明太祖復其朝鮮舊名。朝鮮之太宗李芳遠朝實錄，後附禮樂地理政算各篇，比於史之有志，其文一倣吾國志體。彼之所謂文獻，如禮樂之類，無甚裨益於吾國學術之討論。惟地理則爲彼境自有之疆索，非得其紀載，不能詳；且於吾國東北地域之沿革出入，關係甚密，於前清先世之發祥地，尤爲考證之根抵。蓋幹朵里卽抑婁之諧音，抑婁卽桂婁之變音，桂婁以山名，本在朝鮮東北境內，至後漢則女真部族全境悉以抑婁名之。幹朵里地域，在渤海時爲率賓府之建州所轄。率賓之名，遼時尙沿之，金已諧音爲恤品，今謂之綏芬。建州固在圖們江流域，幹朵里卽在其中。而幹朵里族之處幹木河，卽清世所謂俄漠惠者，則純在明清兩代朝鮮東北境內，咸吉道之鏡城府地。清太祖太宗時，尙知朝鮮境內有其幹朵里之族屬存在，屢勤兵於東海瓦爾喀，取其遺種以歸。當時所患者地曠而人太稀，故急於得其人，而並不貪朝鮮之地。瓦爾喀者兀良哈之轉音。兀良哈明史專屬之大甯三衛，在朝鮮則爲建州女真，及大甯三衛之統名，清代改爲烏梁海，其義爲林木中人。稍北則其音變爲兀狄哈，或作兀者，又作完者，清代則作窩集，或作烏稽，皆是一義；舊稱山戎，所謂打牲部落，以別於蒙古之遊牧部落者也。蒙古之近興安嶺者，亦爲恃獵而生，卽亦爲林木中人，其生活與在長白山者相同，故西北亦有烏梁海部落。唐取高麗，已奄有周秦漢朝鮮之地。後沒於渤海，遂爲屬國，而不直轄。渤海亦不能全有，高麗惟得東北咸吉道地。遼滅渤海，其地入遼。金始亦起自其地，而遷松花江流域以創業。既滅遼分宋之半，意在經營中夏，不暇問高麗所占女真舊地。高麗自遼天祚之世，乘遼之衰，取得圖們江流域，歷金世未改。元之興也，取圖們江之高麗地，屬遼東行省之開元路，鴨綠江之高麗地，爲遼東行省之東甯路。繼且盡收高麗全國爲征東行省，惟未廢其國王，仍卽以爲征東行省之丞相。未幾并復其

國權。而開元東甯兩路所轄高麗之地，則終元世不改也。明初尚設三萬衛於斡朵里地，後以運道難繼，撤還；遂并開元之名而移之。又改開元爲開原，而爲三萬衛之新治所。久而自忘開原之先，本名開元。且開元自有故地，遂附會歧出，甚且指開原爲金之黃龍府矣。東甯亦自明初設衛，治在鴨綠之西岸，其東岸平壤等地，皆還之朝鮮。清世沿之，朝鮮國遂以圖們鴨綠兩江爲界。撮舉朝鮮疆域沿革之略，皆與我東北地理相關。而朝鮮太宗實錄中地理志所記，最爲簡明翔實，撰自明宣德年間，後來無大變革，足爲譚東北史地者一大論證，不當以屬國載記觀之。傅君孟真錄此志，別爲印行，以備治東北史地者蒐討，爲益於史地學者非淺。以余方撰明元清系通紀，頗曾循繹其文，屬爲揭其旨意於簡端，用書涉獵所知者如此。

民國二十三年，六月，心史氏孟森書。